

LIBERÂ IL PAPE

Tal libri dai “Ats dai apuestui” si lei che Erode, dopo di vê copât Jacum, al brinche ancje Pieri. «Pieri al jere duncje in preson, biel che dute la glesie no sostave di clamâ Diu per lui» (At 12,5). O savìn dal intervent dal agnul che lu libare fasintlu passâ framieç des vuardiis. Te storie dai prins secui, si lei dispès che i imperadôrs romans a metevin lis mans sul pape, sucessôr di Pieri, e lu copavin o a limitavin la sô libertât.

Cul timp lis robis si son ribaltadis e il pape al è diventât potent. Di perseguitât e carnefiç. La storie e je bon testimoni dai fûcs impiâts pai eretics, pai disubidients e l’Incuisizion e je une magle nere che nissun giubileo nol po parâle jù.

Gjesù nol à copât nissun pe veretât, ma al à dade la sô vite. Di cualchi secul in ca, però, il pape al è presonîr di se stes e lis sôs cjadenis a son simpri plui evidents e vincolantis.

Al è presonîr di chel cjstiel là che si è trincerât cu la sô curie, di chel implant verticistic che lu met parsore di dut e di ducj, a partî dai cristians, siei fradis inte fede e intal batisim, dai predis, siei fradis tal sacerdozi, e dai vescui, siei fradis te sucession dai apuestui e te plenece dal ordin. Il colegjo apostolic al è sparît, gлотût de preminence esclusive di Pieri. Al po dome conseâ e bati lis mans. Al è presonîr de sô convinzion, o ossesion, di jessi l’interprete diret, immediât, esclusîf de volontât di Diu, ma o savìn che il ream di Diu al è plui grant de glesie e Diu al fevele «unevore di voltis e in cetancj mûts» (Eb 1, 1) ancje in di di vuê. Se al è, come che a si firme, «famei dai fameis di Diu», al scuen liberâsi di dut chel aparât di podè economic, politic, mediatic che lu fâs diferent di chel prin pape ch’al à dit: «No ai ne aur ne arint» (At 3. 6). Se chest al vâl in gjenerâl pai papis dai ultims secui, dal Concili di Trent in ca, al vâl in maniere partricolâr par chest pape, Zuan Pauli II, che al à puartât il papât a une visibilitât e a une preminence e esclusivitât mai cognossude. Chest pape, ch’al semee libar di ogni scheme e regule, in Realtât al è il plui incjadenât di ducj e lis cjadenis lu paralizin simpri di plui. Al è presonîr de sô ossesion dal primât, che i impedìs di metisi in strade cun ducj i oms viers la veretât assolude che e je plui in là di ducj.

Se al è cunvint che l’unitât e je la robe plui impuartante, al fâs passâ in secont plan dut il rest. Al è presonîr de sô convinzion messianiche, che lu sburte a imponi al mont intîr lis sôs convinzioms e devozioms personâls. Crodint di jessi l’unic rapresentant di Crist, si sint obleât a intervignî in robis che a no son di sô competence e a fevelâ simpri di dut, come leader mondiâl.

La glesie e je prin di dut sâl che si disfe e la sô fuarce e sta te sô fedeltât a Crist crocifis e no te sô visibilitât o grandece umane. Al è presonîr dai tancj che a fasin de sô persone un cult e a puartin a lis stelis ancje lis sôs peraulis plui banâls, impen di judâlu cuntune critiche rispjetose ma francje. Al è presonîr dai moviments che i batin lis mans e lu osanin e intant a metin in vore i lôr prigjets no ducj spirituâi. Al è presonîr de sô convinzion di jessi stât sîlzût par un grant progjet e di jessi indispensabil e di scugnî scombati al di là dai limits di salût e di capacitât, cu la cuâl che il vanzeli nus dîs che «o sin fameis che no valin nuje» (Lc 17, 10). La glesie interie, impen di metisi in adorazion denant di lui, e à di preâ pe sô liberazion, che nus liberarà ancje nô.

Fevrâr dal 2005

pre Antini Beline